

04 IULIE

**ACATISTUL
SOBORULUI
SF. MUCENICI
ROMANOVI
DE LA
MOSCOVA**

ACATISTIER-RU

СВІТИ ЦАРСТВЕНІ І ЇЇНІ ЛІЧБНИЦІ

ЦРЬ НІКОЛАЙ ІІ

ЦРІЦА АЛЕЗАНДРА

ЦРІЦА ОЛЬГА
ЦРІЦА МАРІА

ЦРІЦА ТАТІАНА
ЦРІЦА АНАСТАСІА
ЦРІЦА АЛЕЗІЯ



Акафист

СВЯТЫМ ЦАРСТВЕННЫМ

мученикам

Кондак 1

Избрании царственнии страстотерпцы седмочисленнии, Христу Богу, яко агнцы непорочнии, в жертву принесшиися. Земли Руския хранителие и молитвенницы, яко стяжавшии от Царя царствующих и Господа господствующих благодать молитися за ны, от всяких нас бед и напастей свободите, да благодарственно восхваляем вас: Радуйтесь, царственнии страстотерпцы, Руси Святыя похвало и украшение.

Икос 1

Ангели Божий, хранителие душ и телес ваших, наставляху и укрепляху вас, святии, не токмо во страданиих, но присно утверждаху во истиннем пути, да будет житие ваше праведным к увенчанию мученическому, темже прославляем вас сице:

Радуйтесь, страх Божий в сердце, яко

основание, положившии;

радуйтесь, премудрость Божию издетска возлюбившии.

Радуйтесь, не яко наемницы, но сыны Божии Господу угодившии;

радуйтесь, яко и звания друзей Божиих удостоившиися.

Радуйтесь, христианскаго благочестия твердое правило;

радуйтесь, Православныя веры крепкое исповедание.

Радуйтесь, царствующаго рода Рускаго утверждение;

радуйтесь, страждущаго народа нашего утешение.

Радуйтесь, царственнии страстотерпцы, Руси Святыя похвало и украшение.

Кондак 2

Видящи Пресвятая Дева скорбь, стенание и плач народа нашего, егда смутная времена насташа, умилосердися и яви милость Свою чрез икону, именуемую Феодоровская, во избрании законнаго от Бога Михаила царя, да будет икона та покров и защита ему и всему новоизбранному царскому роду и во утверждение державы

Руския. Сего ради мы благодарственно вопием Богу: Аллилуиа!

Икос 2

Разумеша людие Рустии, яко Господь избранием на царство Руское новаго рода от благочестиваго корене утиши нестроения, смуты, мятежи в Земли нашей и мир и благостояние Церкви Своей дарова. Мы же, к вам, царственнии страстотерпцы, яко рождием от ветви сея благословенныя, со умилением вопием:

Радуйтесь, венец и похвало рода царскаго и священнаго;

радуйтесь, корене благочестиваго преславныя отрасли.

Радуйтесь, Рускаго Патриарха Филарета и великия старицы инокини Марфы святое наследие;

радуйтесь, благочестия двоицы сея преславное исполнение.

Радуйтесь, священнаго праотца вашего любовь и ревность о Православном отечестве наследовавшии;

радуйтесь, преподобныя праматере смирение и упование на помощь Божию восприемшии.

Радуйтесь, прадеднаго благословения Божия

Матере удостоившийся;

радуйтесь, благословение сие, яко залог, даже до смерти мученическая соблюдшии.

Радуйтесь, царственный страстотерпцы, Руси Святыя похвало и украшение.

Кондак 3

Сила Божия и промышление Всевышняго явися в рождении твоём, царственный страстотерпче Николае, великому бо чудотворцу Мир Ликийскому уподобився, новый заступник Руския Земли показался еси, многия же скорби и болезни, яко праведный Иов, в житии претерпев, ныне с лики мученическими наслаждаешися райскаго блаженства, воспевая Богу: Аллилуиа!

Икос 3

Имея сугубыя заступники и покровители, Иова праведнаго и Николая святителя, в рождении твоём, державный страстотерпче, добродетели тех в сердце стяжал еси. Мы же, благодаряще Бога и дивящися Его всесильному промышлению о тебе, благоговейне воспеваем сие:

Радуйся, в молитвах святителя Мир Ликийских присно призываяй;

радуйся, того помощью Рускую Державу

праведно окормляяй.

Радуйся, сердечным попечением о людех тому уподобивыйся;

радуйся, милосердие во всех делах, якоже оный, явивый.

Радуйся, истину и верность во всем житии твоём, яко Иов, сохранивый;

радуйся, кротость и незлобие того в сердце твоём стяжавый.

Радуйся, в тяжких бедах, якоже многострадальный праведник, устнама пред Богом ничимже согрешивый;

радуйся, вся приключшаяся тебе благодарно со смирением терпевый.

Радуйтесь, царственнии страстотерпцы, Руси Святыя похвало и украшение.

Кондак 4

Бурю смущения, воздвигаемую от человек злочестивых в стране нашей, твой державный родитель рукою крепкою укроти и царство Руское цело и нерушимо тебе в наследие даде. Обаче завистию диаволею Земля наша в вящее искушение ввержена бысть и ты, угодниче Божий, отверже. Ты же, святче, провидя сие поущение Божие за грехи людския, усердно Богу воспевал еси: Аллилуиа!

Икос 4

Слыша наставления державных родителей твоих и праведнаго Иоанна Кронштадтскаго, како подобает православному государю быти, положил еси в сердце, царственный стратотерпче Николае, Православие, державу и народ Руский во единстве блюсти. Сего ради мы воспеваем тебе тако:

Радуйся, благочестивых родителей отрадо и утешение;

радуйся, мудрых наставлений исполнение.

Радуйся, издетска вере и благочестию наученный,

радуйся, в любви к Богу и Церкви укорененный;

Радуйся, в верности ко отечеству и народу своему воспитанный;

радуйся, душу свою за него положити готовый.

Радуйся, царский венец от Бога с благоговением восприемый;

радуйся, дара Духа Святаго на царское служение в помазании миром удостоенный.

Радуйтеся, царственнии стратотерпцы, Руси Святыя похвало и украшение.

Кондак 5

Богосветлая звезда во мраце скорбей благоверней супружнице твоей явился еси, царственный страстотерпче Николае, указуя и возглавляя путь ея, якоже повеле Господь. Мы же, прославляюще ваш благословенный святой брачный союз во Христе, хвалу Богу воздаем, поюще: Аллилуиа!

Икос 5

Видя царственный страстотерпец, яко зарю солнечную, яко Ангела света, юницу Александру, избра ю себе в благоверную супружницу, православную царицу и мать народа Рускаго. Мы же, ведуще усердное служение ея, воспеваем сие:

Радуйся, именитаго рода благочестивое прозябение;

радуйся, от лютерския веры к Православию образе спасительнаго прехождения.

Радуйся, всем сердцем молитву возлюбившая; радуйся, о службе Божией сердечно ревновавшая.

Радуйся, словом Божиим и писанием святых отец себе назидавшая;

радуйся, посты церковныя благоговейно

соблюдавшая.

Радуйся, русское благочестие достойне
восприемшая;

радуйся, истинная жизни во Христе
приобщившаяся.

Радуйтесь, царственный страстотерпцы, Руси
Святая похвало и украшение.

Кондак 6

Проповедницы чистоты святого брака во образ
единства Христа и Церкви явились есте,
благодарнии Николае и Александро. Вы бо,
благодать сего великаго таинства достойно
восприемше, даже до мученическа кончины
Христу и друг другу верность сохранили есте,
присно воспевающе Богу: Аллилуиа!

Икос 6

Возсия в стране Рустей, яко прекрасная
светила, благодарная царственная чета Николай
и Александра, истинная домашняя церковь,
супрузи, связуемии союзом любве о Господе. Мы
же, прославляюще образ их супружескаго
целомудрия и добронравнаго жития в мире сем
развращеннем и грешнем, со благоговением
воспеваем сице:

Радуйтесь, всем сердцем Бога взыскавшии;

радуйтесь, в путех Господних непорочно ходившии.

Радуйтесь, чето честная, свыше избранная;
радуйтесь, двоице святая, славою и честью от Бога увенчанная.

Радуйтесь, целомудрие супружеское
многочадием прославившии;

радуйтесь, чада своя, яко новосаждения
масличная, окрест трапезы Небесныя
сбравшии.

Радуйтесь, в супружестве благочестно жити
научающии;

радуйтесь, мир Христов оным милостивно
низпосылающии.

Радуйтесь, царственнии страстотерпцы, Руси
Святыя похвало и украшение.

Кондак 7

Хотяще свой дом благочестно устроить,
заповеди Господни и брак честен добре соблюли
есте, благовернии супрузи Николае и
Александро. Темже, многочадием свою
домашнюю церковь украсивше и дщери своя,
яко мудрыя евангельския девы, воспитавше, в
невесты Христу уготовали есте. С нимиже ныне
вкупе воспеваете Богу: Аллилуиа!

Икос 7

Новую милость яви Господь народу русскому, добронравныя и целомудренныя дщери благочестивыя царственныя четы: Ольгу, Татиану, Марию и Анастасию. Тыя бо, женам мирноносицам подражающыя и елей милосердия в душах хранящыя, болящим и страждущим усердно послужиша и мученическую смерть за Христа прияша. Сего ради прославляем их сице:

Радуйтесь, дщери царицы, обетований Божиих сподобльшиися;

радуйтесь, заповедь Божию о почитании родителей соблюдшия.

Радуйтесь, царскаго достоинства не посрамившия;

радуйтесь, стихиями мира сего не порабощенныя.

Радуйтесь, людем, сущым в бедах и скорбех, помогающия;

радуйтесь, за врагов своих усердно молящияся.

Радуйтесь, агницы непорочныя, в жертву Богу себе принесшия;

радуйтесь, невесты Христовы, в чертозех Жениха Небеснаго пребывающия.

Радуйтесь, царственнии страсготерпцы, Руси Святыя похвало и украшение.

Кондак 8

Странно и чудно бысть рождение твое, святой царевичу Алексие. Плод бо благославен молитв Саровскаго чудотворца и чаемый царственный наследник родителей быв, слава, надежда и упование явился еси всем концем Земли нашея. Сего ради людие Рустии с радостию благодарственно воспеша Богу: Аллилуиа!

Икос 8

К вышним душею детскою, яко Ангел, устремляясь, святой царевичу Алексие, родители, сестры, сродники и ближняя искренне возлюбил еси и, яко агнец незлобивый, руками злочестивых убиен, новый отрок страстотерпец явился еси. Сего ради восхваляем тя сице:

Радуйся, отроча, от утробы матерния Богом предъизбранное;

радуйся, чадо, усердными родительскими молитвами к чудотворцу Саровскому Руси дарованное.

Радуйся, царевичу добролюбезный и кроткий, милосердие в сердце стяжавый;

радуйся, страдальче, многия скорби и недуги измлада безропотно терпевый.

Радуйся, наследниче Рускаго престола, от незаконных убиенный;

радуйся, наследником Царствия Небеснаго от Бога явленный.

Радуйся, агнче непорочный, яко праведный Авель, умерщвленный;

радуйся, страстотерпче, к лику святых отроков, яко Димитрий царевич, причтенный.

Радуйтесь, царственнии страстотерпцы, Руси Святыя похвало и украшение.

Кондак 9

Всяк благочестивый удивляется о тебе, царю Николае, како ты во времена, егда в земли нашей истина умалися и подавляшеся неправдою, пребыл еси сын верный Святыя Церкви, защитник и хранитель Православныя веры, таже исповедник и мученик Христов. Сего ради Церковь Русская, ликующи, Богу вопиет: Аллилуиа!

Икос 9

Ветии зловещаннии тщашася оболгати тя лжою и лестию, и истребити память о тебе, царственный помазанниче Божий Николае, кровавым тя нарицающе, обаче погибе память тех с шумом. К тебе же, воистину кровь свою за Христа пролившему, Русский народ с покаянием вопиет:

Радуйся, прославления праведников и
угодников Божиих добрый рачителю;

радуйся, Кронштадтскаго пастыря и
Саровскаго чудотворца усердный почитателю.

Радуйся, православных храмов боголюбивый
созидателю;

радуйся, иноческих обителей и монашества
благочестивый покровителю.

Радуйся, Святыя Земли и Горы Афонския
щедрый благодетелю;

радуйся, духовных вертоградов мудрый
попечителю.

Радуйся, возрождения соборнаго начала
Церкве Русския устроителю;

радуйся, восстановления всеРусскаго
патриаршаго престола ревнителю.

Радуйтеся, царственнии страстотерпцы, Руси
Святыя похвало и украшение.

Кондак 10

Спасти и сохранить хотя православное царство
Русское цело и нерушимо, святой благоверный
царю Николае и, видя ослепление народа твоего,
отрекшагося от Царя Небеснаго, такожде и
земнаго, в душевных муках, оставил еси престол
земный. Темже, уповая на милость Господа и

себе в руке Божии предав, непоколебим в вере и благочестии пребыл еси, воспевая: Аллилуиа!

Икос 10

Стена и ограждение был еси всем православным людем Руским, святыи благоверный царю Николае, избавляя их от нашествия иноплеменников и братоубийственныя брани и мир, елико возможно, тщался еси имети со всеми. Мы же, ведуще сие, благодарне тебе воспеваем:

Радуйся, пророчески призывый народы мечи на орала перековати;

радуйся, евангельски сподобивыйся блаженства миротворцев стяжати.

Радуйся, стран словенских надежный защитителю;

радуйся, народов державы Руския сугубый попечителю.

Радуйся, державы Руския мудрый правителю;
радуйся, во бранех искусный и доблий воителю.

Радуйся, дерзостных дел служителей беззакония тайнаго губителю;

радуйся, восставших на Бога и на тя, яко помазанника Его, посрамителю.

Радуйтесь, царственный страстотерпцы, Руси Святыя похвало и украшение.

Кондак 11

Пения всякаго достойна память ваша, святии царственный страстотерпцы. Вы бо, образ исповедничества и ревности по Бозе верным людем показавше, заповедаете не мстити злодеющим, яко любы токмо победит зло, паче же прощати гонящим и молитву творити за них, благодарственно поюще Богу: Аллилуиа!

Икос 11

Светоносный светильник седмочисленный вемы вас, святии царственный мученицы, царским бо путем шествующе, в жертву благоугодную Агнцу Божию уготоваете себе и невинно смерть приясте. Темже просвещение нам даруйте, озаряюще омраченная сердца наша, и верным путем шествовати научите, прославляющим вас сице:

Радуйтесь, агнцы непорочнии, Христу Пастырю последовавшии;

радуйтесь, образ исповедничества, верным людем показавшии.

Радуйтесь, от юности совесть чисту соблюдшии;

радуйтесь, жизни конец достойно
восприемшии.

Радуйтесь, седмочисленнии страстотерпцы, во
едином душе Богу представшии;

радуйтесь, кровию мученическою Церковь
Христову украсившии.

Радуйтесь, новомученицы, за Русь Святую от
безбожных пострадавшии;

радуйтесь, лик страстотерпцев Руских добле
восполнившии.

Радуйтесь, царственнии страстотерпцы, Руси
Святыя похвало и украшение.

Кондак 12

Благодать изрядну Бог дарова Церкви Рустей,
прославив на Небеси святыя царственныя
страстотерпцы. Сего ради и мы на земли
прославляем вас, яко истинныя хранители и
покровители страны нашея, и Богу вопием:
Аллилуиа!

Икос 12

Поюще промышление Божие, подвигшее
сердца людей Руских прославити вас,
царственнии страстотерпцы, на земли
евангельски пожившия и за Христа от
безбожных пострадавшия и чудесы по смерти

прославльшиися, дерзаем воспевати сице:

Радуйтеся, яко прославлению вашему многия люди возрадовашася;

радуйтеся, яко чудесы вашими сердца верных укрепишася.

Радуйтеся, народ Руский к покаянию призывающии;

радуйтеся, отеческия заветы исполняти нас наставляющии.

Радуйтеся, молитвами вашими от междоусобия нас избавляющии;

радуйтеся, в мире и любви со всеми жити нам помогающии.

Радуйтеся, яко образы ваши мироточением прославляются;

радуйтеся, яко в честь вашу храмы созидаются.

Радуйтеся, царственнии страстотерпцы, Руси Святыя похвало и украшение.

Кондак 13

О единомушная великоименитая седмерице, царственнии страстотерпцы, многия скорби, поругания, страдания душевная и смерть телесную за Христа приемшии и венцы небесными от Него увенчаннии! Приимите ныне

от нас похвальное прославление и сердечное покаяние и милостивным вашим ходатайством умолите Царя Славы мир Церкви нашей даровати, страну в Православии, благочестии и единстве сохранить, нам же ожесточения сердечнаго и ослепления избавитися, да сыновне Богу вопием: Аллилуиа!

(Этот кондак читается трижды)